

■ GRISCHUN

Cunter in scumond da pitbulls en Svizra

(cc) La regenza grischuna beneventa bain da princip ch'ils aspects da segirezza en connex cun la tratga da chauns vegnia reglada per tut la Svizra en la lescha federala davart la protecziun dals animals. Percunter s'exprima ella cunter l'iniziativa parlamentara concernent in scumond da pitbulls en Svizra en la furma che vegn preschentada en l'iniziativa.

Sco che la regenza punctuescha en sia consultaziun, refusa ella las midadas proponidas en la lescha federala davart la protecziun dals animals. La finamira da proteger l'uman cunter blessuras tras chauns possia bain vegnir sustegnida. Las mesiras che vegnan proponidas na sajan dentant betg adequatas e convenentas. Per la regenza va il project bler memia lunsch. Ultra da quai n'è el betg ponderà tras e cuntegna blers puncts che n'èn betg clers. En spezial ils plans da classificar ils chauns en trais classas «pauc privlus», «eventualmain privlus» e «privlus» stoppian vegnir refusads. Questa classificaziun punctuass che la genetica d'ina razza determineschia primarmain, sch'in chaun saja privlus u betg. Quai na po betg vegnir cumprovà scientificamain e na correspunda betg a las experientschas. Ultra da quai fissan la lavur ed ils custs per exequir en spezial las proceduras da permissiun enorms e na stessan en nagina relaziun cun la limitaziun dal privel tras morsas. Refusada vegn er la regulaziun che vegn proponida areguard in scumond da tgnair, d'allevar e d'importar tscherts chauns. Per l'ina èsi difficil da determinar la razza d'in chaun en moda indiscutibla. Per l'autra pon las possessuras ed ils possessurs da chauns che tgnan lur chauns sco simbols da status midar immediatamain ad autras razzas.



Era Pitbulls na vegnan betg scumandads en il Grischun en il futur.

KEYSTONE

Nagin scumond per tscherts razs da chaun

■ (sda/anr) En il Grischun pon ins tgnair er en il futur chauns da tuts razs. Il cussegl grond renunzia da scumandar ils uschenumnads «chauns da cumbat». I na dat era nagina obligaziun per ina assicuranza da responsabladad. Nov è dentant che chauns ston far in test, sch'els crodan si per in motiv u l'auter. Sch'in chaun vegn, sin fundament d'in tal test, classificà sco privlus, sto el purtar buccarè, ed il possessur sto metter el vid la corda en regiuns abitadas.

Il cussegl grond ha refusà la proposta

che possessurs da chauns dovran ina assicuranza da responsabladad (Haftpflichtversicherung) che cuvra in donn da 3 milliuns francs.

Plinavant ha cusseglier guvernativ Hansjörg Trachsel fatg attent, che da 214 incaps cun chauns, ch'èn vegnids annunziads ils ultims 15 mais, sajan 196 cas stads bagatellas. 15 cas sajan stads pli grevs. Perquai han Trachsel ed auters oratur en il cussegl grond avertì da betg surreagir. Il pli grond privel en connex cun attatgas dad animals vegnia numna-

damain da chauns che pertgiran muntaneras e da vatgas mumma sin las pastiras.

L'assicuranza da responsabladad ha il cussegl grond refusà cun 67 cunter 29 vuschs. Anc pli vehement ha il parlament ditg «na» tar la proposta da Luca Tenchio (pcd/Cuira) ch'i dovria en il futur lubientschas per pudair tgnair chauns privlus. Tenchio ha avisà sin las reglamentaziuns severas da Basilea-Champagna che sajan sa cumprovadas. Ma be 20 parlamentaris han sustegnì l'idea da Tenchio, 76 deputads han votà encunter.

■ PUNTG DA VISTA

Pitbull u dackel?

DA CLAUDIA CADRUVI / ANR

Isto capitar l'emprim insatge, uschiglio na voteschan politichers betg per mesiras severas puncto chauns privlus. Quai è la conclusiun ch'ins po trair sunter la debatta d'ier en il cussegl grond. Ils deputads han decidì ier a Cuira che chauns che dattan en egl han d'abolver in test. Ma reglas pli severas pertutgant chauns privlus, sco Luca Tenchio (pcd/Cuira) ha proponì, ha il parlament refusà cun 76 cunter 20 vuschs. Tenchio ha pretendì ina lubientscha per chauns privlus.

Per part han ins bunamain fatg ridicul il deputà pervi da sia proposta. Igl è vegnì ditg che la gliעד da la citad na haja ozendi nagina relaziun normala pli tar ils animals. Igl è vegnì ditg che betg mo ils pitbulls sajan privlus, mabain ch'er in dackel possia morder, i dependia be co ch'il chaun vegnia tratg. Ed igl è vegnì ditg ch'era chauns che pertgiran muntaneras sajan privlus, ma tar lezs chauns sajan ins led, sch'els sajan aggressivs.

Ma l'agressivitat d'in chaun che pertgira nursas ha in niz per la carstgaunadad. L'agressivitat d'in pitbull betg. E pertutgant la gliעד temelitga da la citad: La schanza d'inscuntrar in chaun privlus en la citad è pli gronda che d'inscuntrar in luf u in urs sin la champagna. U ha insatgi gia ina giada inscuntrà in luf u in urs en in auto da posta en Surselva u l'Engiadina.

Ils deputads han probabel era refusà prescripziuns pli severas, perquai ch'i dat en il Grischun betg tants chauns da rassas che valan sco aggressivas. Lain pia sperar che quai restia era vinavant uschia. E lain era sperar ch'i na capitia qua betg accidents sco quel dad Oberglatt avant dus onns. Pertge uschiglio votass il cussegl grond tuttenina gist il cuntrari, numnadamain cun 76 cunter 20 vuschs per scumonds da chauns privlus.